

Firmât un impuartant Protocol di Intese

ARLeF e Comun di Udin pe Marilenghe

Al è stât firmât di pôc il Protocol di Intese tra la ARLeF e il Comun di Udin, rapresentâts dal President de ARLeF Eros Cisilino e dal Sindic Pietro Fontanini.

Il document al à chês di meti in vore azions specificchis che a sigurin une presince impuartante de lenghe furlane tes structuris e tai servizis dal Comun di Udin, cussì di garantî il rispjet dai dirits linguistics su la fonde dai principis che a son fissâts de Cjarte Europeane des Lenghis Regionâls o Minoritariis, de Convenzion cuadri su la protezion des minorancis nazionâls, dal art. 6 de Costituzione de Republiche Taliane, de Leç statâl 482/99 su la tutele des minorancis linguistichis storichis e de Leç regionâl 29/2007 su la tutele de lenghe furlane.

La Agenzie e il Comun, pai prossims trê agns, si impegnin a meti adun une taule di lavôr par colaborâ inte realizazion di azions di disvilup e di poie ae lenghe furlane in ducj i setôrs che a son individuâts dal Protocol.

La ARLeF e furnirà il servizis di traduzion, la consulente linguistiche e chês tecniche in cont de politiche linguistiche, de validazion e de certificazion des azions di promozion dal ûs dal furlan e de condivizion sui siei canâi di comunicazion; il Comun, cui siei uficis, al coordinarà lis ativitâts e al metarà a disposizion lis sôs risorsis economichis pe realizazion dai materiâi e des azions previodudis.



Di man çampe: il President Eros Cisilino, il Sindic Pietro Fontanini, l'Assessôr Fabrizio Cigolot

“La firme dal Protocol - al dis il President Eros Cisilino - e rapresente un moment significatîf pe ARLeF che, daûr dal so Statût, e favoris e e promôf la nassite di colaborazions cun organisims publics e privâts pe promozion e pe difusion de lenghe furlane intai diviers ambits de societât contemporanie. Tai agns la Agenzie e il Comun a àn za lavorât in sinergie in setôrs diferents. Tra lis colaborazions plui resintis, par esempli, il servizis di traduzion in lenghe furlane di ducj i panei descritîfs de Galerie di Art Antighe e dal Museu de Fotografie, che il lôr gnûf implant al è stât a pene screât.

La firme di cheste gnove intese e rinfuarce duncje l'impegn comun e la strade za inviade”.

“La tutele de lenghe furlane - al à marcât il Prin Citadin - e je, tant che sindic di Udin, una tra lis prioritâts

dal gno program eletorâl. Par rivâ a dâi finalmentri atuazion ae legislazion comunitarie, statâl e regionâl in materie di tutele des lenghis minoritariis, al covente sclari i compits dai sogjets istituzionai che a àn di cjapâ sù cheste sfide che e je sedi storiche che culturâl.

Par ce che al tocje il Comun di Udin, l'interlocutôr naturâl e za colaudât al è rapresentât de ARLeF.”

Chê tra la ARLeF e il Comun di Udin e je, di fat, une colaborazion che e va indenant di agns. Si ricuarde il supuart de Agenzie ae Aministrazion inte scritture dal Plan Speciâl di Politiche Linguistiche e pe sôs metode in vore; la traduzion dai tescj pe segnaletiche e pe cartelonistiche; il supuart tes ativitâts de Biblioteche Civiche pai fruts e te promozion dal furlan in cetantis manifestazions.

Furlan a scuele, la sielte juste

“Dis di sî al furlan a scuele par to fi!” e je la campagne di informazion e di sensibilizazion realizade de ARLeF in ocasion des preiscrizions, par supuartâ la sielte cussiente dal plurilinguism. Di fat, pes scuelis de infanzie, primariis e secundariis di prin grât, tal moment de iscrizion a ogni cicli scolastic i gjenitôrs a son clamâts a sielzi l'insegnament dal furlan.

Passe il 76% dai gjenitôrs al sielç il furlan tes scuelis de infanzie e primariis.

Le campagne stampe e a cjapât dentri inserzions sui principai cuotidians e setemanai in cjarte dal teritori furlanofon e sui portai di informazion in linie. Cun di plui, e je stade amplificade midiant dai profii Facebook e Instagram de Agenzie

e di un video che al spiegha parcè che una vore di gjenitôrs a àn za sielzût

**Dis di sî al
furlan a scuele
par to fi!**

Sceglilo entro il 31 gennaio 2020
al momento dell'iscrizione on-line
o presso la segreteria della scuola.

ARLeF

AGENZIE
REGIONAL
PE LENGHE
FURLANE

f

ig

yt

|

arlef.it



l'insegnament dal furlan pai lôr fis.
arlef.it/progjets/furlan-a-scuele/